

In cumbat tranter muntogna e Bassa smanatscha

La protecziun da la natira n'è betg cuntenta cun la revisiun da la lescha federala da chatscha

DAD ANDREAS CADONAU / ANR

■ **Il pled final en connex cun la revisiun da la lescha federala da chatscha e la regulaziun da la populaziun dal luf n'è anc betg crudà. In referendum cunter la revisiun smanatscha e cun quel referendum crescha il privel che la regulaziun da la populaziun dal luf resta vivanv restrenschiada.** Smanatschas da

tschiffar il referendum explitgadas da differentas partidas ed organisaziuns durant il tractament dad ina lescha entras il parlament federal appartegn al giuè politic. Quai ha il cusseglier dals chantuns, *Stefan Engler*, accentuà. E quellas smanatschas èn gia vegnidas nà da las organisaziuns per la protecziun da la natira enaquella ch'il cussegl federal ha preschentà sias propostas per reverder la lescha federala da chatscha. Ina revisiun iniziada dad ina moziun inoltrada dal cusseglier dals chantuns grischun *Stefan Engler* cun l'intent da lubir la regulaziun da la populaziun dal luf en Svizra. Ussa, tschintg onns suenter che Engler ha deponì sia moziun va la revisiun da la lescha da chatscha en la fasa finala. A chaschun da la proxima sessiun dal parlament che cumenza ils 3 da zercladur sa fatschenta il cussegl dals chantuns entaifer l'eliminaziun da las differenzas tar il cussegl naziunal cun la lescha. E la probabladad ch'il suveran svizzer retschaiva il pled final en chausa lescha da chatscha e regulaziun da la populaziun dal luf è intacta, sco quai che la cussegliera naziunala *Silva Semadeni* ha ditg. La cussegliera naziunala grischuna ha explitgà da nun esser involvida directamain en la decisiun dal referendum essend ch'ella na presideschia betg pli la Pro Natura. In eventual referen-



La revisiun da la lescha federala da chatscha resta dispitavla e cun ella la regulaziun da la populaziun dal luf.

MAD

dum vegnia ella dentant a sustegnair. Bain ha la cussegliera naziunala grischuna sustegnì avant tschintg onns la moziun dad Engler en il cussegl naziunal. Cun la revisiun actuala na po la cussegliera naziunala grischuna dentant betg s'identifigar. Sia malcontentientscha davart la proposta dal cussegl federal adattada dal cussegl dals chantuns e dal cussegl naziunal ha la cus-

segliera naziunala gia formulà en ina columna publicitada en LQ.

Il cussegl naziunal ha stritgà castur e luf-tscherver

Bain ha il cussegl naziunal decidì a chaschun da la sessiun da primavera intginas adattaziuns che tradeschan tuttavia l'intenziun dad impedir in referendum.

Uschia ha il cussegl naziunal stritgà il castur ed il luf-tscherver da la glista dals animals protegids, proponids per lubir da regular la populaziun. Sin quella glista figureschan actualmain sulet il capricorn ed il luf. Per Semadeni nun èn quellas adattaziuns dal cussegl naziunal da gronda valur. Ella ha menziunà ina formulaziun da l'artitgel 7 da la lescha che pussibileschia al

cussegl federal da lubir da tut temp la regulaziun dad ulteriurs animals protegids sch'el saja da l'opiniun che quai saja necessari. E pertutgant la regulaziun dal luf na pretendia la varianta dal cussegl naziunal naginas mesiras da protecziun da muntaneras. Ed ils chantuns na basegnian betg ina lubientscha da la confederaziun per sajettar in luf, els stoppian sulet iniziar ina procedura d'audiziun tar l'Uffizi federal da l'ambient. Engler ha declerà ch'il cussegl dals chantuns vegnia segir anc ina giada ad examinar ils puncts critics da la revisiun da la lescha da chatscha a chaschun da la proxima sessiun. Suenter l'eliminaziun da las differenzas tranter cussegl dals chantuns e cussegl naziunal e la votaziun finala cumenza la fasa da referendum.

Cunter l'interess grischun

In referendum cunter la lescha da chatscha nun po esser, tenor il parairi dad Engler, en l'interess dal chantun Grischun. El vesa ina sumeglianta situaziun politica, en cas ch'il referendum vegn instradà, sco tar la votaziun da las segundas abitaziuns. In cumbat politic davart la protecziun dal luf tranter la populaziun muntagnarda e quella da la Bassa. In cumbat che pudess senz'auter finir a disfavur da la muntogna, essend che la protecziun da las spezias gauda ina tscherta reputaziun tar la populaziun, principalmain tar quella che viva en la Bassa. Ina votaziun da referendum pretenda sulet la maioritad da las vuschs, ina maioritad dals chantuns n'è betg dumandada. Aves la populaziun svizra da dar suatientscha ad in eventual referendum cunter la lescha federala da chatscha resta la situaziun actuala en vigur e la regulaziun da la populaziun dal luf fitg restrenschiada.